

## KWABASEGALATHIYA

**1** Uphawuli umphostoli – ongathunywanga evela ebantwini loba ngumuntu, kodwa nguJesu Khristu loNkulunkulu uYise, owamvusayo kwabafileyo – <sup>2</sup> labo bonke abazalwane abalami,

Kumabandla aseGalathiya:

<sup>3</sup> Umusa lokuthula akube kini kuvela kuNkulunkulu uBaba wethu laseNkosini uJesu Khristu,

<sup>4</sup> owazinikelayo ngenxa yezono zethu ukuba asihlenge kulesisikhathi esibi, mayelana lentando kaNkulunkulu wethu uBaba, <sup>5</sup> udumo kalube kuye kuze kube laphakade. Amen.

*Kalikho Elinye Ivangeli*

<sup>6</sup> Ngiyamangala ukuthi limdela masinya kangaka lowo owalibiza ngomusa kaKhristu, njalo liphendukela evangelini elehlukileyo <sup>7</sup> elingasivangeli lakancane impela. Kusobala abanye abantu bayaliphazamisa njalo bazama ukungcolisa ivangeli likaKhristu.

<sup>8</sup> Kodwa lanxa thina, loba ingilosi evela ezulwini, singatshumayela elinye ivangeli ngaphandle kwalelo esalitshumayelayo kini, kalahlwe kuze kube nini lanini! <sup>9</sup> Njengoba sesivele sitshilo, lakhathesi ngiyatsho futhi ngithi: Uma loba ngubani etshumayela kini elinye ivangeli ngaphandle kwalelo elalivumayo, kalahlwe kuze kube nini lanini!

<sup>10</sup> Kambe sengizama ukuzuza ukwamukelwa ngabantu, loba uNkulunkulu na? Kumbe njalo ngizama ukuthokozisa abantu na? Aluba ngilokhu ngizama ukuthokozisa abantu, beningayikuba yinceku kaKhristu.

*Ubizo LukaPhawuli NguNkulunkulu*

<sup>11</sup> Ngithanda ukuba lazi, bazalwane, ukuthi ivangeli engalitshumayelayo kalisilutho olwenziwa ngabantu.

<sup>12</sup> Kangilamukelanga emuntwini, njalo kangilifundiswanga; kodwa ngalamukela ngokwambulelwa nguJesu Khristu.

<sup>13</sup> Ngoba selezwa ngempilo yami yakuqala yokholo lwesiJuda, ukuthi ngalihlukuluza kakhulu okunganani ibandla likaNkulunkulu ngazama lokulichitha. <sup>14</sup> Ngangiqhubeka ngokholo lwesiJuda ukudlula amaJuda amanengi ayintanga yami, njalo ngangitshisekela kakhulu imikhuba yabokhokho bami.

<sup>15</sup> Kodwa kwathi uNkulunkulu, owangiphawulayo kusukela ekuzalweni kwami wasengibiza ngomusa wakhe, ethokoza <sup>16</sup> ukuba aveze iNdodana yakhe kimi, ukuze ngitshumayeke phakathi kwabezizweni, kangibuzanga muntu.

<sup>17</sup> Angizange ngiye eJerusalema ukuyabona labo ababengabaphostoli mina ngingakabi nguye, kodwa ngahle ngaya e-Arabhiya khonokho nje kwathi muva ngabuyela eDamaseko. <sup>18</sup> Emva kweminyaka emithathu, ngaya eJerusalema ukuba ngijwayelane loPhethro ngahlala laye izinsuku ezilitshumi lanhlano. <sup>19</sup> Kangibonanga lamunye wabanye abaphostoli – uJakhobe kuphela umfowabo weNkosi.

<sup>20</sup> Ngियाqinisa kini phambi kukaNkulunkulu ukuthi lokhu engililobela ngakho akusimanga.

<sup>21</sup> Muva ngaya eSiriya kanye laseKhilikhiya. <sup>22</sup> Mina siqu sami ngangingaziwa emabandleni aseJudiya akuKhristu. <sup>23</sup> Ayesizwa umbiko nje kuphela usithi: "Umuntu owayesihlukuluza kuqala khathe si usetshumayela ukholo ake wazama ukuluchitha.: <sup>24</sup> Amdumisa uNkulunkulu ngenxa yami.

*UPhawuli Wamukelwa Ngabaphostoli*

**2** Emva kweminyaka elitshumi lane ngaya eJerusalema futhi, ngalesisikhathi ngiloBhanaba. Ngathatha loThithusi futhi. <sup>2</sup> Ngaya khona kulandela ukwambulelwa ngethula phambi kwabo ivangeli engilitshumayela kwabezizweni. Kodwa lokhu ngakwenza ngasese kulabo ababekhanya bengabakhokheli, ngokwesaba ukuthi ngangisenza kumbe sengenze umsebenzi oyize. <sup>3</sup> Ikanti loThithusi, owayelami, kazange abanjwe ngamandla ukuba asoke lanxa wayengumGiriki.

<sup>4</sup> (Indaba le yavela) ngoba abanye abazalwane bamanga basebengene phakathi kwethu ukuba bahlole ukukhululeka esilakho kuKhristu uJesu basenze izigqili.

<sup>5</sup> Kasibavumelanga lakancane, ukuze iqiniso levangeli lihlale likhona kini.

<sup>6</sup> Labo okwakungathi baqakathekile – loba kuyini ababeyikho akwenzi mahluko kimi; uNkulunkulu kahluleli ngokubonakala ngaphandle – abantu labo kabengenzanga lutho elizwini lami. <sup>7</sup> Esikhundleni salokho babona ukuba ngangiphiwe umsebenzi wokutshumayela ivangeli kwabezizweni, njengoPhethro owaphiwa umsebenzi wokutshumayela ivangeli kumaJuda.

<sup>8</sup> Ngoba uNkulunkulu, owafunzelela imfundiso kaPhethro njengomphostoli kumaJuda, wafunzelela lemfundiso yami njengomphostoli kwabezizweni.

<sup>9</sup> UJakhobe, loPhethro kanye loJohane, abadume ngokuba zinsika, banika mina loBhanaba ilungelo lobudlelwano bokuba ngabasekeli lapho basebone umusa engawuphiwayo. Bavuma ukuba siye kwabezizweni, bona baye kumaJuda. <sup>10</sup> Abakucelayo kuphela nje yikuthi kumele siqhubeke sikhumbula abayanga, yona kanye into engangitshisekela ukuyenza.

*UPhawuli Uphikisa UPhethro*

<sup>11</sup> Ekufikeni kukaPhethro e-Antiyoki ngamphikisa sikhangelene, ngoba wayephambanisa. <sup>12</sup> Abantu abathile abavela kuJakhobe bengakafiki yena wayesidla labezizweni. Kodwa sebefikile waqalisa ukuhlelela emuva wazehlukanisa labezizweni ngoba wayesesaba ababengabeqembu lokusoka. <sup>13</sup> Amanye amaJuda lawo ahlanganyela laye kulokhukuzenzisa kwakhe, kwaze kwathi ngenxa yokuzenzisa kwabo uBhanaba waholelwa ekulahlekeni.

<sup>14</sup> Kwathi lapho ngibona ukuba babengenzi okuhambelana leqiniso levangeli, ngathi kuPhethro phambi kwabo bonke, "Wena ungumJuda, kodwa uphila njengowezizweni hatshi njengomJuda. Pho kwenzeka njani ukuba ubambe ngamandla abezizweni ukuba balandele imikhuba yamaJuda na?"

<sup>15</sup> "Thina esingamaJuda ngokuzalwa hatshi 'izoni zezizweni' <sup>16</sup> siyakwazi ukuthi umuntu kalungisiswa yikugcina umthetho, kodwa yikukholwa kuJesu Khristu. Ngakho-ke, lathi futhi, sibeke ukukholwa kwethu kuKhristu uJesu ukuba silungiswe yikukholwa kuKhristu hatshi ngokugcina umthetho, ngoba kakho ozalungisiswa ngokugcina umthetho.

<sup>17</sup> "Uma lapho sisafuna ukulungisiswa kuKhristu, kube sokubonakala ukuthi thina ngokwethu siyizoni, lokho kutsho ukuthi uKhristu usekela isono na? Akunjalo lakancane! <sup>8</sup> Uma ngikwakha kutsha lokho engakudilizayo, ngibonakalisa ukuthi ngiyisaphulamthetho. <sup>19</sup> Ngoba ngomthetho ngafa emthethweni ukuze ngiphilele uNkulunkulu.

<sup>20</sup> Sengibethelwe kanye loKhristu, akuseyimi engiphilayo, kodwa uKhristu uphila phakathi kwami. Ukuphila

engikuphila emzimbeni, ngiphila ngokukholwa eNdodaneni kaNkulunkulu, eyangithandayo njalo yazinikela ngenxa yami. <sup>21</sup> Kangi wudeli umusa kaNkulunkulu, ngoba aluba ukulunga kuzuzwa ngomthetho, uKhristu wafela ize.

*Ukukholwa Kumbé Ukugcinwa Komthetho*

**3** Lina maGalathiya ayizithutha!

Ngubani oliloyileyo? Phambi kwawo amehlo enu uJesu Khristu wabonakaliswa obala ebethelwe. <sup>2</sup> Mina ngifuna ukwazi into eyodwa nje kini: UMoya lamamukela ngokugcina umthetho, loba ngokukholwa lokho elakuzwayo na? <sup>3</sup> Kanti liyizithutha kangaka na? Emva kokuqalisa ngoMoya, khathesi selizama ukuzuzwa ukuphelela ngemizamo yabantu na? <sup>4</sup> Kanti lihlupheke kangaka lihluphekela ize na – uma impela kwakungokweze?

<sup>5</sup> Kanti uNkulunkulu ulinika uMoya wakhe asebenze izimangaliso phakathi kwenu ngoba ligcina umthetho, loba ngoba likholwa lokho elakuzwayo na?

<sup>6</sup> Khumbulani u-Abrahama: "Wakholwa kuNkulunkulu, kwabalelwa kuye njengokulunga." <sup>7</sup> Ngakho zwisisani ukuthi labo abakholwayo bangabantwana baka-Abrahama.

<sup>8</sup> Umbhalo wabona ngaphambili ukuthi uNkulunkulu wayezalungisa abezizweni ngokukholwa, wasehle ememezela ivangeli ngaphambili ku-Abrahama esithi: "Izizwe zonke zizabusiwa ngawe." <sup>9</sup> Ngakho labo abalokholo babusiwa kanye lo-Abrahama, umuntu wokholo.

<sup>10</sup> Bonke abathembe umthetho bangaphansi kwesiqalekiso, ngoba kulotshiwe ukuthi: "Uthukiwe umuntu wonke ongaqhubeki esenza konke okulotshwe encwadini yoMthetho."

<sup>11</sup> Ngokusobala kakho umuntu olungisiswa ngomthetho phambi kukaNkulunkulu, ngoba, "Abalungileyo bazaphila ngokukholwa." <sup>12</sup> Umthetho kaweyamanga ekukholweni; kodwa, "Umuntu owenze izinto lezi uzaphila ngazo." <sup>13</sup> UKhristu wasihlenga esiqalekiseni somthetho ngokuba yisiqalekiso ngenxa yethu, ngoba kulotshiwe ukuthi: "Uqalekisiwe umuntu wonke olengiswa esihlahleni."

<sup>14</sup> Wasihlenga ukuze isibusiso esaphiwa u-Abrahama sifike kwabezizweni ngoKhristu uJesu, ukuze samukele isithembiso sikaMoya ngokukholwa.

*Umthetho Lesithembiso*

<sup>15</sup> Bazalwane, ake ngithathe isibonelo sokuphila kwansuku zonke. Njengoba engekho ongabeka eceleni loba engeze kusivumelwano sabantu esenziwe ngemfanelo, kunjalo-ke lakule indaba.

<sup>16</sup> Izithembiso zatshiwo ku-Abrahama lakunzalo yakhe. Umbhalo kawuthi "kwabenzalo," usitsho abantu abanengi, kodwa uthi, "lakunzalo yakhe," usitsho umuntu oyedwa, lowo kunguKhristu.

<sup>17</sup> Engikutshoyo yilokhu: Umthetho, owabekwa eminyakeni engamakhulu amane lamatshumi amathathu muva, kawusibeki eceleni isivumelwano esamiswa ngaphambili nguNkulunkulu ngalokho wesule isithembiso. <sup>18</sup> Ngoba uma ilifa leyame emthethweni, ngalokho kaliseyamanga kusithembiso; kodwa uNkulunkulu ngomusa wakhe, walinika u-Abrahama ngesithembiso.

<sup>19</sup> Pho, yayiyini-ke injongo yomthetho? Wengezelelwa ngenxa yeziphambeko kwaze kwafika iNzalo eyayitshiwo yisithembiso. Umthetho wenziwa wasebenza ngezingilosi langommeli.

<sup>20</sup> Kodwa ummeli kameli icele elilodwa; kodwa munye uNkulunkulu.

<sup>21</sup> Kambe, ngalokho, umthetho uphambene lezithembiso

zikaNkulunkulu na? Akunjalo lakancane! Ngoba uma kwakubekwe umthetho onika ukuphila, ukulunga impela kwakuzavela ngomthetho.

<sup>22</sup> Kodwa umbhalo uyatsho ukuthi umhlaba wonke uyisigqili sesono, ukwenza ukuthi okwakuthenjisiwe, kunikwa ngokukholwa kuJesu Khristu, kunikwe labo abakholwayo.

<sup>23</sup> Ukholo lolu lungakabi khona, sasiyizibotshwa zomthetho, sivalelwe ukhoho luze lubonakaliswe. <sup>24</sup> Ngakho umthetho waphiwa amandla okusiholela kuKhristu ukuba silungisiswe ngokukholwa. <sup>25</sup> Khathesi-ke njengoba ukukholwa sekukhona, kasisekho ngaphansi kwamandla omthetho.

#### *Amadodana KaNkulunkulu*

<sup>26</sup> Lonke lingamadodana kaNkulunkulu ngokukholwa kuKhristu uJesu, <sup>27</sup> ngoba lonke lina elabhaphathizelwa kuKhristu selizembathise ngoKhristu.

<sup>28</sup> AkulamJuda loba umGiriki, isigqili loba okhululekileyo, owesilisa loba owesifazana, ngoba lonke limunye kuKhristu uJesu. <sup>29</sup> Uma lingabakaKhristu, ngalokho liyinzalo ka-Abrahama, lezindlalifa mayelana lesithembiso.

**4** Engikutshoyo yikuthi nxa indlalifa isesengumntwana, kayehlukananga lesigqili lanxa nje ingumnikazi welifa lonke. <sup>2</sup> Ingaphansi kwabaphathi lababambeli kuze kufike isikhathi esabekwa nguyise.

<sup>3</sup> Ngokunjalo lathi lapho sasingabantwana sasigqilazwe yizimiso ezidingakalayo zomhlaba. <sup>4</sup> Kodwa kwathi lapho isikhathi sesifike ngokupheleleyo, uNkulunkulu wathuma iNdodana yakhe, yazalwa ngowesifazana, izalwa ngaphansi komthetho, <sup>5</sup> ukuba ihlenge

abangaphansi komthetho, ukuze sithole amalungelo apheleleyo amadodana.

<sup>6</sup> Njengokuba lingamadodana, uNkulunkulu wathuma uMoya omemezayo esithi, "Abha Baba." <sup>7</sup> Ngakho kawuseyiso sigqili, kodwa indodana; ngakho njengoba usuyindodana, uNkulunkulu usekwenze waba yindlalifa futhi.

<sup>8</sup> Kuqala, uNkulunkulu lingakamazi, laliyizigqili zalabo abangayisibo onkulunkulu ngemvelo. <sup>9</sup> Kodwa khathesi uNkulunkulu selimazi, loba ngithi uNkulunkulu uselazi – pho kwenzakala njani ukuthi liyabuyela emuva kuleyana imikhuba ebuthakathaka leyize na? Liyafuna yini ukuba ligqilazwe yiyo njalo na? <sup>10</sup> Lina ligcina izinsuku ezithile lezinyanga, izikhathi zomnyaka kanye leminyaka!

<sup>11</sup> Ngiyalinqinekela, ukuthi ngenye indlela sengichithe imizamo yami kini. <sup>12</sup> Ngiyalincenga, bazalwane, wobani njengami, ngoba mina ngaba njengani. Kalenzanga lutho olubi kimi.

<sup>13</sup> Njengoba lisazi, ngatshumayela ivangeli kini kuqala ngenxa yomkhuhlane. <sup>14</sup> Lanxa umkhuhlane wami wawuyisilingo kini, kalizange lingeyise kumbe lingihleke. Kodwa langamukela kwangathi ngangiyingilosi kaNkulunkulu, angathi nganginguKhristu yena ngokwakhe.

<sup>15</sup> Intokozo yenu yonke isiyengaphi na? Ngingafakaza ukuthi aluba lalingenzanjalo, lalingakhuphuluza amehlo enu linginike wona. <sup>16</sup> Khathesi sengibe yisitha senu yini ngokulitshela iqiniso na?

<sup>17</sup> Abantu labo batshisekela ukulenza libe ngabazalwane babo, kodwa kungasikho kobuhle. Abakufunayo yikulehlukanisa lathi ukuze litshisekele bona. <sup>18</sup> Ukutshiseka kulungile, uma injongo inhle, lokuba kube njalo kokuphela, hatshi kuphela nxa ngilani.

<sup>19</sup> Bantwabami abathandekayo, lina engilomhelo ngani futhi uKhristu aze abunjwe phakathi kwenu, <sup>20</sup> ngiyafisa kakhulu ukuba lani khathesi ngiguqule isimo sami ngoba ngikhathazekile ngani.

### *UHagari LoSara*

<sup>21</sup> Ngitshelani lina elifuna ukuba ngaphansi komthetho, kalikwazi yini ukuthi umthetho uthini? <sup>22</sup> Ngoba kulotshiwe ukuthi u-Abrahama wayelamadodana amabili, enye ingeyesigqilikazi lenye ingeyowesifazana okhululekileyo.

<sup>23</sup> Indodana yakhe yesigqilikazi yazalwa ngendlela ejwayelekileyo; kodwa indodana yakhe kowesifazana okhululekileyo yazalwa kulandela isithembiso.

<sup>24</sup> Izinto lezi zingathathwa njengomzekeliso; ngoba abesifazana ababili bamele izivumelwano ezimbili. Esinye isivumelwano sivela eNtabeni iSinayi e-Arabhiya njalo sizala abantwana abazakuba yizigqili: Lo nguHagari. <sup>25</sup> UHagari umele iNtaba iSinayi e-Arabhiya njalo uhambelana ledolobho lakhathesi eleJerusalema, ngoba lisebugqilini kanye labantwana balo. <sup>26</sup> Kodwa iJerusalema ephezulu ikhululekile, njalo ingumama wethu.

<sup>27</sup> Ngoba kulotshiwe ukuthi:

"Thokoza wena mfazi oyinyumba,  
ongazali bantwana;  
kekezela ukhale kakhulu,  
wena ongelabuhlungu bomhelo;  
kulabantwana abanengi bomfazi  
odeliweyo  
kulabakhe lowo olendoda."

<sup>28</sup> Ngakho lina bazalwane, njengo-Isaka, lingabantwana besithembiso.

<sup>29</sup> Ngalesosikhathi indodana eyazalwa ngendlela ejwayelekileyo yahlukuluza

indodana eyazalwa ngamandla kaMoya. Kunjalo lakhathesi.

<sup>30</sup> Kodwa umbhalo uthini na? Uthi: "Susa isigqilikazi lendodana yaso, ngoba indodana yesigqilikazi kayiyikwabelana ilifa lendodana yowesifazana okhululekileyo." <sup>31</sup> Ngakho, bazalwane, thina kasisibo bantwana besigqilikazi, kodwa abowesifazana okhululekileyo.

### *Ukukhululeka KuKhristu*

**5** UKhristu wasikhululela ukuba sibe lenkululeko. Ngakho manini liqine, lingavumeli ukuba libotshelwe futhi ejogweni lobugqili.

<sup>2</sup> Qaphelani amazwi ami! Mina, Phawuli, ngiyalitshela ukuthi lingavuma ukusoka, uKhristu kayikuba lusizo kini.

<sup>3</sup> Njalo ngiyaqinisa ebantwini bonke abavumayo ukusoka ukuthi balomlandu wokulalela umthetho wonke. <sup>4</sup> Lina elizama ukulungisiswa ngomthetho selehlukane iswe loKhristu; selehlukane lokulunga.

<sup>5</sup> Kodwa ngokukholwa siholwa ngumoya silindele ithemba lokulunga ngokutshiseka. <sup>6</sup> Ngoba kuKhristu uJesu ukusoka loba ukungasoki akulasizo. Into kuphela eyiyo eqakathekileyo yikukholwa kuzibonakaliso ngothanda.

<sup>7</sup> Kade liqhubeka kuhle. Ngubani oliphazamisileyo walinqabela ukulalela iqiniso na? <sup>8</sup> Ukuncenga okunjalo kakaveli kulowo olibizayo. <sup>9</sup> "Imvubelo encinyazana ibilisa inhlama yonke."

<sup>10</sup> Ngiyathemba eNkosini ukuthi kaliyikwamukela omunye umnakano. Lowo olibeka phakathi kwenyakanyaka uzajeziswa, loba engubani.

<sup>11</sup> Bazalwane, nxa ngisatshumayela ngokusoka, pho kungani ngilokhu ngihlukuluzwa? Nxa kunjalo isikhubekiso sesiphambano sesisusiwe.

<sup>12</sup> Labo abahluphayo, ngifisa ukuthi ngabe bayaqhubeka bazithene!

*Ukuphila NgoMoya*

<sup>13</sup> Lina, bazalwane bami, labizelwa ukuba likhululeke. Kodwa lingasebenzisi inkululeko yenu ukuthokozisa imvelo yenu yesono; kodwa sizanani ngothando.

<sup>14</sup> Umthetho wonke uhlanganiswa ngumlayo owodwa othi: "Thanda umakhelwana wakho njengoba uzithanda." <sup>15</sup> Uma liqhubeka lilumana lidlana, qaphelani hlezi liqedane du.

<sup>16</sup> Ngakho ngithi, philani ngoMoya, kaliyikuthokozisa izinkanuko zenu zemvelo elesono. <sup>17</sup> Ngoba imvelo yesono ikhanuka okuphambene loMoya, loMoya okuphambene lemvelo yesono. Kuyaphikisana, ukuze lingenzi elikuthandayo. <sup>18</sup> Kodwa uma likhokhelwa nguMoya, kalikho ngaphansi komthetho.

<sup>19</sup> Izenzo zemvelo yesono zisobala: ubufebe, lokungesabi ukujeziswa, lokuxhwala; <sup>20</sup> ukukhonza izithombe lobuthakathi; inzondo, lokuxabana, lomona, lentukuthelo, lobuhwaba, lokungezwani, lokungavumelani <sup>21</sup> kanye lomhawu; ukudakwa, lokuzitika ngamanyala kanye lokunye okunjalo. Ngiyalixwayisa, njengoba ngenza ngaphambili, ukuthi abaphila kanje kabayikulidla ilifa lombuso kaNkulunkulu.

<sup>22</sup> Kodwa izithelo zikaMoya luthando, lokuthokoza, lokuthula, lokubekezela, lomusa, lokulunga, lokuthembeka, <sup>23</sup> lobumnene kanye lokuzithiba. Ezintweni ezinje akulamthetho.

<sup>24</sup> Labo abangabakaKhristu sebayibethela esiphambanweni imvelo yabo yesono lokufutheka kwayo kanye lezinkanuko. <sup>25</sup> Njengoba siphila ngomoya, kasenzeni okuhambelana loMoya. <sup>26</sup> Kasingazikhukhumezi, singaqalani kumbe senzlane umona.

*Ukwenza Okulungileyo Kubo Bonke*

**6** Bazalwane, uma umuntu ehilelwe yisono esithile lina abomoya kumele limbuyise kakuhle. Kodwa lizinanzelele; lani futhi lingalingwa. <sup>2</sup> Thwalani imithwalo yomunye lomunye, ngalokho lizagcwalisa umthetho kaKhristu. <sup>3</sup> Uma umuntu ezitshaya ulutho yena engasilutho, uyazikhohlisa.

<sup>4</sup> Umuntu ngamunye kahlole izenzo zakhe. Ngalokho angaziqhenya, kungekho ukuziqathanisa lomunye, <sup>5</sup> ngoba lowo lalowo kumele athwale umthwalo wakhe.

<sup>6</sup> Loba ngubani othola ukufundiswa ngelizwi umele abelane zonke izinto ezinhle lalowo omfundisayo.

<sup>7</sup> Lingakhohliswa: UNkulunkulu angeke ahlekwa. Umuntu uvuna lokho akuhlanyelayo. <sup>8</sup> Lowo ohlanyela ukuthokozisa imvelo yakhe yesono, kuleyomvelo uzavuna ukuchitheka; lowo ohlanyela ukuthokozisa uMoya, kuMoya uzavuna ukuphila okulaphakade.

<sup>9</sup> Kasingadinwa yikwenza okuhle, ngoba ngesikhathi esifaneleyo sizavuna isivuno uma singadeli. <sup>10</sup> Ngakho-ke, njengokuba silethuba, kasenzeni okulungileyo ebantwini bonke, ikakhulu kulabo abangabemuli yabakholwayo.

*Hatshi Ukusoka Kodwa Indalo Entsha*

<sup>11</sup> Khangelani ukuthi makhulu kanganani amabala engiwasebenzisayo lapho ngililobela ngesami isandla! <sup>12</sup> Labo abafuna ukubukwa ngaphandle bazama ukulicindezela ukuba lisoke. Isizatho sinye sokuba benze lokhu yikuba babalekele ukuhlukuluzelwa isiphambano sikaKhristu. <sup>13</sup> Lalabo abasokileyo kabawulaleli umthetho, kodwa bafuna ukuba lisoke ukuze bazincome ngemizimba yenu.

<sup>14</sup> Mina kangingazincomi lanini ngaphandle kwangesiphambano seNkosi

yethu uJesu Khristu, umhlaba wonke  
owabethelwa ngaso kimi, lami njalo  
emhlabeni. <sup>15</sup> Ukusoka loba ukungasoki  
akutsho lutho; okuqakathekileyo  
yikudalwa kutsha. <sup>16</sup> Ukuthula lesihawu  
kubo bonke abalandela umthetho lo,  
kanye laku-Israyeli kaNkulunkulu.

<sup>17</sup> Okokucina, akungabi lamuntu  
ongibangela uhlupho, ngoba emzimbeni  
wami ngilezimpawu zikaJesu.

<sup>18</sup> Umusa weNkosi yethu uJesu Khristu  
kawube lomoya wenu, bazalwane.  
Ameni.